

中國第一歷史檔案館整理

康熙起居注

第二冊

中國第一歷史檔案館整理

康熙起居注

第二冊

中華書局

# 康熙二十一年 壬戌

正月

初一日己酉。早，上以元旦，率諸王、貝子、公等，內大臣、大學士、都統、尚書、精奇尼哈番、侍衛等，往堂子行禮畢，回宮。辰時，上率諸王、貝子、公等，內大臣、大學士、都統、尚書、精奇尼哈番、侍衛等官，詣太皇太后宮行禮，又詣皇太后宮行禮畢，回宮。少頃，御中和殿，內大臣、侍衛及內閣、翰林院、禮部、都察院、詹事府等衙門官員，慶賀元旦禮畢，御太和門。諸王、貝子、公等文武官員及來朝元旦外藩王、貝勒、貝子、公等，台吉等，朝鮮等國使臣，上慶賀元旦表，行禮畢，回宮。巳時，復御保和殿，賜外藩王、貝勒、貝子、公、台吉等，內大臣、侍衛、上三旗大學士以下侍郎等官、都統以下副都統等官飯。午時，復御太和門，大宴諸王、貝子、公等，內大臣、侍衛、文武各官及來朝元旦外藩王、貝勒、貝子、公、台吉等，朝鮮等國使臣。樂作，上進酒。和碩康親王傑倣以下，外藩王等俱於坐前，令侍衛等送酒賜飲；貝子、宗室、公以下，蒙古貝子、公、台吉等，俱召至簷柱下賜飲；滿漢大學士以下，侍郎等官以上，八旗滿洲、蒙古、漢軍都統以下，副都統以上等官，俱召至簷柱下賜飲。宴罷，衆謝恩畢，上回宮。本日起居注官牛鈕、孫在豐。

初二日庚戌。本日起居注官常書、王頊齡。

初三日辛亥。本日起居注官崔蔚林、阿山。

初四日壬子。巳時，上詣太皇太后、皇太后宮問安。本日起居注官胡簡敬、朱馬泰。

初五日癸丑。本日起居注官阿哈達、嚴繩孫。

初六日甲寅。巳時，上詣太皇太后、皇太后宮問安。本日起居注官牛鈕、董訥。

初七日乙卯。早，上於保和殿，視祀太廟祝版畢，回宮。本日起居注官阿山、曹禾。

初八日丙辰。早，上躬詣太廟致祭，禮畢，回宮。本日起居注官朱馬泰、徐乾學。

初九日丁巳。辰時，上詣太皇太后宮，率諸王以下，滿漢文武二品官以上，進慶賀太皇太后七十

萬壽金銀緞匹等物。巳時，大學士勒德洪、明珠等傳諭漢大學士、學士、九卿、詹事、科、道等官曰：

「向來乾清宮內，止宴滿洲諸臣，並未宴及漢官。今思滿漢皆屬一體，欲將漢官亦於乾清宮內特行筵宴，爾等以爲何如？」大學士李蔚等奏曰：「內廷筵宴，出自異數曠典，臣等祇承隆恩，何以克當！」本日

起居注官阿哈達、王頊齡。

初十日戊午。巳時，上詣太皇太后、皇太后宮問安。本日起居注官嚴我斯、常書。

十一日己未。本日起居注官牛鈕、潘耒。

十二日庚申。早，上於保和殿，視祀祈穀壇祝版畢，回宮。本日起居注官蔣弘道、阿山。

十三日辛酉。早，上躬詣祈穀壇致祭，禮畢，回宮。午時，上詣太皇太后、皇太后宮問安。

本日起居注官沈荃、朱馬泰。

十四日壬戌。午時，上御保和殿，宴外藩王、貝勒、貝子、公等，內大臣、滿漢大學士、三旗都統、

尚書、副都統、侍郎、學士、侍衛等。樂舞作，上進酒。上召外藩王、貝勒、貝子等至御座前，親賜飲。又召大學士等至御座前，親賜飲。宴罷，衆謝恩畢，上回宮。申時，上御乾清宮，賜廷臣宴，內閣大學士、學士，各部、院、寺堂官，翰林院學士、講讀學士、侍讀、侍講及日講官、編修、檢討、詹事府、坊、局等官，科、道掌印官九十三員，於乾清門序立。上命學士張英、侍講高士奇傳諭曰：「向來內殿筵宴，諸臣未與。今因海內乂安，時當令序，特於乾清宮賜宴，君臣一體，共樂昇平，用昭上下泰交之盛。諸臣皆歡忭暢飲，以副朕懷。」諸臣跪聽宣畢，大學士李蔚奏曰：「蒙皇上特恩曠典，千載一遇，臣等不勝感戴，愧不克承，惟滋惶悚。」奏畢，分左右班，以次序進，樂作，於乾清宮各就位，叩頭，坐。大學士明珠至御前跪，進酒上壽，諸臣齊跪，叩頭。候上飲盡觴，明珠復進前，捧御杯趨下跪，更卮，飲賜酒，叩頭訖，執位。叩頭，坐。諸臣齊叩頭，坐。上進膳，諸臣乃飯。上命各飽飫盡量。少選，徹饌，更設酒。酒既陳，大學士勒德洪至御前跪，進酒上壽，諸臣跪叩。德洪飲賜酒，如前儀。上命大學士、尚書、侍郎、學士以次至御座前，親賜飲。以下諸臣，俱命至御前賜飲。仍各就位，叩頭，坐。飲數巡，大學士李蔚至御前跪，進酒上壽，諸臣跪叩。蔚飲賜酒，如前儀。大學士馮溥至御前跪，進酒上壽，諸臣跪叩，如前儀。上命學士張玉書、張英傳諭曰：「今日內殿嘉宴，特勅諸臣笑語無禁。」諸臣奉詔，暢飲極歡。樂奏二闋，上復命張玉書、張英傳諭曰：「宴畢時，諸臣可近御座前看燈，朕更賜以卮酒。」於是大學士、尚書、都御史以次至御座傍，看鰲山燈，上復親賜飲。又命侍郎以下諸臣，俱至御前賜飲。特命光祿寺卿馬世濟、右通政陳汝器至御座前，親賜飲，以世濟爲殉難巡撫馬雄鎮之子，汝器爲殉難副使陳啓泰之子也。諸臣仍各就位，叩頭，坐。既徹筵，諸臣以次出，於乾清宮月臺上，行一跪三叩頭禮謝恩，

樂作。行禮畢，上命羣臣有霑醉者，令內官扶掖而出。時夜色已二鼓，上傳內閣學士張玉書、翰林院掌院學士陳廷敬、學士張英近御座前，諭曰：「每見漢唐以來，君臣協樂，有廣和之詩。今朕雖不敢效古先聖王，亦欲紀一時之盛，可做栢梁體賦詩進覽。」臣廷敬奏言：「臣等草野賤士，得覩天家景物，蒙聖恩深厚，真明良喜起之休。且百工熙，庶事康，皆君臣交儆之辭。此自是唐虞盛事，臣等身際休明，受恩愈深，但愧報稱愈難。」臣玉書奏言：「詩體雖用栢梁，實則虞廷之盛典。」臣英奏言：「廣歌唐虞已然，不獨漢唐爲然。」於是廷敬等出宣旨。羣臣奏曰：「臣等敢不歌詠太平，但恐不能廣颺聖德。」臣廷敬等入奏時，上已進御乾清宮西室。隨傳人，如羣臣言奏畢，出。大學士臣李壽言：「栢梁體詩，首一句是武帝所製，今當恭請皇上御製首句。」臣廷敬等復入奏。上曰：「明日早發。」是日，上遣中使捧御製賜大學士杜立德酒饌。御札云：「諭大學士杜立德。卿弼亮老臣，久任機密，端醇恪恭，勤慎素著，茲海宇蕩平，時當令序，內殿賜宴廷臣，念卿卧疾，不克同此歡讌，特遣中使慰問，賜以醴饌。卿其加餐珍攝，以副朕惓惓至意。」本日起居注官孫在豐、阿哈達。

十五日癸亥。早，翰林院學士陳廷敬、內閣學士張玉書至乾清門候旨。侍衛捧御製詩序出，羣臣集太和殿下，以次各賦詩九十三韻。御製序：「朕於宣政聽覽之餘，講貫經義，歷觀史冊。於《書》見元首股肱廣颺喜起之盛，於《詩》見鹿鳴、天保諸篇，未嘗不慕古之君臣一德一心、相悅若斯之隆也。今際海內晏安，兵革偃息。首春令序，九陌燈輝，豐穰有徵，吾民咸樂，思與諸臣欣時式燕。爰於乾清宮，廣集簪裾，肆筵授几。斯時也，蟾光熬炬，焜耀堂廉，綵樹瓊葩，雜羅尊俎。許笑言之勿禁，寬儀法之不糾。復令次登文陛，渥以金疊，咸俾有三爵油油之色焉。《易》曰：上下交而志同。《傳》曰：享以訓

恭儉，宴以示慈惠。則今日之兕觥旨酒，豈徒以飲食宴樂云爾哉！顧瞻諸臣，或位居諧弼，或職任卿尹，或典文翰，或司獻納，宜共成篇什，以紹雅頌之音。朕發端首倡，倣柏梁體，班聯遞賡，用昭昇平盛事，冀垂不朽云。」

詩

麗日和風被萬方御製 卿雲爛熳彌紫闈內閣大學士臣勒德洪 一堂喜起歌明良內閣大學士臣明珠 止戈

化洽民物昌內閣大學士臣李蔚 蓼蕭燕譽聖恩長內閣大學士臣馮溥 天心昭格時雨暘吏部尚書臣黃機 豐亨有兆

祝千箱戶部尚書臣梁清標 禮樂文章仰聖皇禮部尚書臣吳正治 廟謨指授靖八荒兵部尚書臣宋德宜 春回丹詔罷桁

楊刑部尚書臣魏象樞 河清海晏禹蹟彰工部尚書臣朱之弼 百度胥飭綱紀張都察院左都御史臣徐元文 千官濟濟

盈巖廊吏部左侍郎臣張士甄 天工無曠勤贊襄吏部右侍郎臣楊永寧 有年歌協臣所望戶部左侍郎臣李天馥 共期

紅朽答殊常戶部右侍郎臣李仙根 轉漕億萬充天倉戶部倉場侍郎臣馬汝驥 邦禮叨替慚趨踰禮部左侍郎臣楊正中

職司寅清佐垂裳禮部右侍郎臣富鴻基 天河洗甲通蠻鄉兵部左侍郎臣焦毓瑞 皇威四暢咸未王兵部右侍郎臣陳

一炳 祇承欽恤和氣翔刑部左侍郎臣杜臻 刑措不用民壽康刑部右侍郎臣葉方鵠 八材庀化師殳斨工部左侍郎

臣趙璣 右平左戚開明堂工部右侍郎臣金鼐 仰窺神策驅天狼內閣學士臣李光地 膏以大澤人胥慶內閣學士臣

張玉書 帝庸作歌追虞唐翰林院掌院學士臣陳廷敬 身依雲漢賡天章翰林院學士臣張英 恪秉訓厲敦羔羊左副都御

史臣宋文運 奉宣仁風之吳疆巡撫江寧左副都御史臣余國柱 九閩跌宕瞻龍光通政使司通政使臣王盛唐 斗杓高掩

貫索芒大理寺卿臣張雲翼 圖列養正親羹牆詹事府詹事臣沈荃 黃鐘大鏞諧禎祥太常寺卿臣崔澄 郊衢擊壤歡

豐穰順天府尹臣熊一瀟 大官珍膳羅酒漿光祿寺卿臣馬世濟 調閑六御騰康莊太僕寺卿臣張可前 忝預風紀凜

清霜僉都御史臣張吉午 出入玉珮聲鏘鏘左通政臣崔官 納言惟允尚職詳右通政臣吳瑛 褒忠厲節感賜觴右通政

臣陳汝器 闔扉閑寂春草芳大理寺少卿臣榮國祚 拜手好生頌禹湯少卿臣徐旭齡 前星令望欽顛叩少詹事臣王澤弘

終始念典用斯減少詹事臣崔蔚林 言謨行範輝縹緗 侍讀學士臣蔣弘道 猗與至德日就將 侍讀學士臣胡簡敬 叨

塵侍從恩莫量侍讀學士臣朱之佐 靖共夙夜無怠遑侍講學士臣嚴我斯 梧桐生矣于高岡侍講學士臣孫在豐 細書

東觀翰墨香侍講學士臣盧琦 三德六行爲士坊國子監祭酒臣王士禎 宮官備位滋悚惶右春坊右庶子臣祖文讓 六經

義葉如笙簧侍讀臣朱典 奎文煥若森琳瑯侍讀臣王封深 朝朝橐筆侍御牀侍講臣董訥 紀載聖治金匱藏侍講臣

王鴻緒 頻年宣室虛對揚侍講臣高士奇 宸篇揆藻燭昊蒼侍講臣郭棻 承華毓德成圭璋左諭德臣陳論 青宮琪樹

棲鸞鳳右諭德臣朱世熙 金輿導從驂雲驥司經局洗馬臣田喜霖 不憚流影耀璧璫左參議臣趙士麟 仁波溟渤同濊汪

左參議臣趙之鼎 鸞旂乘春零露灑右參議臣張鵬 爰賡天保矢勿忘右參議臣鄭重 八表同軌來梯航大理寺丞臣徐

誥武 雲門磬管聲嗶嗶右中允臣吳珂鳴 泰交天闕開春陽左中允臣李錄予 惟睿作聖金玉相 右中允臣鄭開極

珥筆何幸日月傍左贊善臣徐乾學 瑞逾寶鼎兼芝房左贊善臣鄭之謙 堯樽夜醉星低昂右贊善臣沈上塘 在廷

悅豫和宮商右贊善臣王尹方 濫典樂正董上庠司業臣劉芳誥 治登三五麻聲颺修撰臣歸允肅 睿謨典誥同洋

洋編修臣王頊齡 記神聖功臣職當編修臣曹禾 琅函瑤版書焜煌檢討臣潘耒 石渠高議艾粃糠 檢討臣嚴繩孫

日侍清禁研鉛黃編修臣杜訥 願言直節謹自防吏科掌印給事中臣王承祖 帝心勤民重農桑戶科掌印給事中臣王曰

溫 具舉細目恢弘綱禮科掌印給事中臣李迥 誕敷文德四國匡兵科掌印給事中臣劉沛先 嘉禾既殖鋤莠稂刑科掌印

給事中臣傅感丁 奉琛執玉輸筐筐工科掌印給事中臣姚締虞 屈軼朱草紛兩廂掌河南道御史臣唐朝彝 封章問夜



檢皂囊掌江南道御史臣任玥 擬將勁操堅蒼篋掌浙江道御史臣李見龍 朝無闕事聯班竹掌山西道御史臣郭維藩 千

門燎火宵未央掌山東道御史臣孫必振 昇平高宴邁柏梁掌陝西道御史臣衛執蒲

午時，上御保和殿，賜外藩王、貝勒、貝子、公等，內大臣、大學士、都統、尚書、侍衛及台吉等飯。

少頃，又御太和門，大宴外藩王、貝勒、貝子、公等，內大臣、滿漢大學士、三旗都統、尚書、副都統、侍郎、學士、侍衛、台吉等。樂舞作，上進酒。召內大臣、大學士、都統、尚書、副都統、侍郎、學士、頭等侍衛及外藩台吉等至御座前，上親賜酒。宴罷，衆謝恩畢，上回宮。 本日起居注官常書、潘耒。

十六日甲子。 本日起居注官牛鈕、崔蔚林。

十七日乙丑。 早，上御乾清門，聽部院各衙門官員面奏政事畢，部院官員出。 大學士、學士等

隨捧折本面奏請旨；爲吏部題雲貴總督員缺，或開列滿洲，或開列漢軍、漢人請旨事。上曰：「雲、貴地方雖不甚大，但新經恢復，民尚不安。蔡毓榮効力行間，著有功績，聞其進勦雲、貴，人民頗加愛戴，苗猥亦爲畏服。以補授總督，卽令彈壓彼處，爾等以爲何如？」大學士明珠奏曰：「蔡毓榮補授此缺允宜。」上又顧漢大學士等曰：「爾等云何？」李蔚等奏曰：「蔡毓榮兵力甚壯，見統軍滇南，就近補授，聞命卽行任事，庶與地方有神。」上曰：「蔡毓榮着調補雲南、貴州總督。」 本日起居注官胡簡敬、阿山。

十八日丙寅。 早，上御乾清門，聽部院各衙門官員面奏政事畢，部院官員出。 大學士、學士隨捧折本面奏請旨；爲吏部題順天學差開列應差官員職名事。上問曰：「爾等云何？」大學士明珠奏曰：「順天學差人所願往。前翰林院學士陳廷敬兩次至臣衙門言，學差三年方滿，此內有文學者俱可點用。但侍講王鴻緒人品最優，才學素著，凡衙門一應撰擬文字，編纂書史，非王鴻緒不可，應停差遣。其餘點

用，統候睿裁。」上頷之。又問曰：「誰可差遣？」明珠奏曰：「頃漢大學士等言，侍講董訥、諭德陳論俱可用。」上曰：「此差着董訥去。」又陝西總督哈占題，投誠彭時亨令其遷移，口出背妄之言，因行拘禁事。上曰：「據奏彭時亨自言，既爲吳家之臣，卽係清朝罪人，應死則死於四川，應解則解至京師，何必遷移？深爲可惡！故朕昨將議彭時亨部本已經折票，此當誅之人也。至譚天秘情罪亦係重大，着議政王、大臣會同議奏。」未時，上詣太皇太后、皇太后宮問安。本日起居注官朱馬泰、嚴繩孫。

十九日丁卯。早，上御乾清門，聽部院各衙門官員面奏政事畢，部院官員出。大學士、學士隨捧折本面奏請旨：爲吏部題補副都御史員缺，開列卿員及年久監察御史、各部郎中等職名事。上曰：「光祿卿敖哈年久，其餘尚有年久者否？」大學士明珠奏曰：「郎中、監察御史內有詹布禮、塞克德、塞勒布俱係年久。」上曰：「塞克德辦事有才，着補副都御史。」又章泰貝子題請，回京官兵未得月糧馬匹草料，請於荊州、常德等處補給，戶部議應移文湖廣巡撫，不拘何項錢糧，照數補給事。上曰：「雲南所撥餉銀最多，恐有重領之弊。着再詳議具奏。」又議政王、大臣會議，逆賊吳三桂骸骨分送各省，吳世璠首級交與刑部懸掛示衆，逆黨夏國相應凌遲處死，及勢迫投降巴養原等五人，應立斬梟示事。上曰：「此中尚有可議者否？」勒德洪、明珠奏曰：「此輩罪犯已極，應正國法，似無可議。」上從之。又逆賊耿精忠等十人，應凌遲處死，其逆黨黃國瑞等十九人，應立斬事。上曰：「耿精忠身造罪孽，應當極刑。其子輩俱行凌遲，亦有可憫，可改爲斬罪否？」明珠奏曰：「耿精忠之罪較尚之信尤爲重大，尚之信不過縱酒行兇，口出妄言，耿精忠深負國恩，擅自稱帝，且與安親王書內多有狂悖之語，甚爲可惡。」上又曰：「賊黨官員內尚有可矜者否？」明珠奏曰：「此內有陳夢雷、金鏡、田起蛟、李學詩四人，犯罪固應處死，然於

應死之中，尚有可宥之處。」上曰：「耿精忠等事關重大，着議政王、貝勒、大臣、九卿、詹事、科、道會同詳議。其吳三桂骸骨分送各省，及吳世璠首級懸示，夏國相凌遲，巴養原等梟示等事，亦示九卿等知之。」明珠奏曰：「春正雖不用刑，但此輩罪惡甚大，與尋常不同，應於兩三日內完結。」上頷之。本日起居注官常書、董訥。

二十日戊辰。早，上御乾清門，聽部院各衙門官員面奏政事畢，部院官員出。大學士、學士隨捧折本面奏請旨：為吏部題補都察院左都御史員缺，將侍郎達都等開列事。上曰：「這本暫留爾衙門，過三、四日來奏，俟朕思之。」又為直隸巡撫于成龍員缺，或將滿洲或將漢軍、漢人官員開列請旨事。上曰：「直隸地方尚可用滿洲，爾等云何？」大學士明珠奏曰：「用滿洲亦可。」上又問漢大學士，李燾、馮溥奏曰：「但在得人。皇上不拘用何項人，無所不可。」大學士勒德洪奏曰：「直隸地方逼近京師，滿洲人民雜處，宜用滿洲。」上曰：「直隸地方盜賊、逃人向來甚多，若用滿洲，事可漸少，着將滿洲官員開列具奏。」又刑部等衙門議，強賊韓汝攀等行劫蔡順和船隻立斬事。上曰：「韓汝攀等並未持凶器傷人，為饑寒所迫，俱行處決，其情少有可憫。爾等云何？」明珠奏曰：「聖諭允當，臣等所議亦然。」上曰：「此事着該部再議具奏。」又議政王、大臣會議，逆賊耿精忠等分別凌遲處斬事。上曰：「議政王等云何？」明珠奏曰：「議政王等言，上諭極是。耿精忠之子耿顯祖不曾親行作叛，改為處斬，其陳夢雷等四人，俱係微末小人，並不曾為首，免其處死，給與披甲新滿洲為奴。其餘無庸議。」上曰：「着即照此完結。」本日起居注官嚴我斯、阿哈達。

二十一日己巳。早，上御乾清門，聽部院各衙門官員面奏政事。上諭理藩院尚書阿穆瑚瑯等

曰：「近見內外蒙古接壤地方，互相攘奪，盜竊者甚多。遇此等事，遣爾衙門官員前往察看，不思和好兩國，裨益地方，據實奏聞，以副朕驅使，但苟且完局，希圖脫免。凡事有問，諉云不知。此等事情，皆係朕親行諮訪得之，爾衙門堂屬官，何曾啓奏一事？爾衙門官員，筆帖式並無一人克盡職掌，以圖前進。着將此諭傳知，以後務期勤謹効力，不許仍前草率疎忽。」諭畢，阿穆瑚瑯出。大學生、學士隨捧折本面奏請旨：「爲吏部題補湖廣總督員缺，或將滿洲或將漢軍、漢人開列請旨事。上曰：「承平時江南、江西兩省共一總督。今當事平之日，江西總督可以不設。董衛國着調補湖廣總督。」本日起居注官牛鈕、徐乾學。

二十二日庚午。早，上御乾清門，聽部院各衙門官員面奏政事畢，部院官員出。大學生、學士隨捧折本面奏請旨：「爲貴州巡撫楊雍建題請告病解任事。上曰：「楊雍建朕知其人材可用，歷陞巡撫，先曾告病，已與溫旨留任。今大兵凱旋事繁之時，正宜勤勞以圖濟事，反避繁引疾求罷，殊非人臣之禮。着批嚴察議奏旨。」本日起居注官阿山、嚴繩孫。

二十三日辛未。早，上御乾清門，聽部院各衙門官員面奏政事。本日起居注官朱馬泰、曹禾。

二十四日壬申。早，上御乾清門，聽部院各衙門官員面奏政事畢，部院官員出。大學生、學士隨捧折本面奏請旨：「爲禮部題，琉球進貢來使毛見龍等，以特請命廷臣往封伊國王事，部議將封冊交與來使齎回。上曰：「伊等輸誠，懇切求遣使冊封，應特遣官往，着該部再議具奏。」辰時，上詣太皇太后宮問安。是日，內閣學士張玉書、翰林院掌院學士陳廷敬至乾清門，啓奏傳集諸臣，恭閱御製昇平嘉宴

詩序事。上命中使傳入南書房賜茶。二臣奏言：「御製文傳示諸臣。諸臣奏云，皇上御製聖作，天章煥爛。引經據典，盡善盡美，無以復加。昇平景象，太和元氣，皆在篇中。至於御筆親書，尤屬諸臣望外之幸，誠曠世之奇逢，不朽之盛事，羣臣不勝欣慶之至。」上令中使傳諭曰：「序，御筆書；詩，着沈荃書。內廷勒石畢，移貯翰林院敬一亭中。」先是，二十二日早，上傳臣玉書、臣廷敬至南書房，恭閱序文，賜內膳者二。午後，復賜珍果十數器。次日早，又傳二臣至南書房，諭勒石頒布。二臣因奏請將御製序文傳示諸臣，故於是日覆旨云。本日起居注官陳廷敬、牛鈕。

二十五日癸酉。早，上御乾清門，聽部院各衙門官員面奏政事。未時，上御景山內前殿，賜進貢科爾沁國多羅郡王布達禮、科爾沁一品台吉喇弟等，蘇尼忒部落一品台吉阿必達等，阿巴垓部落四品台吉哈蘭扎衣等，吳喇忒部落四品台吉溫冲等，杜爾伯特四品台吉吳爾兔納思圖等食。本日起居注官蔣弘道、阿山。

二十六日甲戌。早，上御乾清門，聽部院各衙門官員面奏政事畢，部院官員出。大學士、學士隨捧折本面奏請旨：爲吏部題總督于成龍兼銜事。上曰：「于成龍操守潔廉，欲特優加職銜，以示勸勵如何？」大學士明珠奏曰：「見行例，于成龍應加侍郎銜。今皇上優加尚書，此乃獎廉至意。」上曰：「然，可加兵部尚書。」又題補左副都御史，開列李廷松等。上曰：「此開列者俱屬平常。」大學士勒德洪奏曰：「誠如聖諭。漢大學士等俱稱侍講王鴻緒才品優長，參劾朱方旦，有關世道，堪任風憲之職。」上曰：「漢大學士意如是，向有補授之例否？」明珠奏曰：「漢大學士皆如此說。其翰林官例陞吏、禮二部，破格錄用，出自皇上裁酌。」上沉思良久曰：「着將以次應陞各官開列來看。」又題補直隸巡撫員缺，開列

學士薩海等。上曰：「格爾古德是謹厚有才之人，用爲巡撫何如？」大學士勒德洪、明珠奏曰：「格爾古德人品最優，滿漢文義精通。」上曰：「科爾坤辦事甚優，此二人孰勝？」明珠奏曰：「科爾坤不識漢字，才品俱佳，辦事極優，可別加大用。」上又顧漢大學士等。李蔚等奏曰：「格爾古德清正和平，學問識見俱優，皇上選用，可謂得人，此畿輔生民之福也。」上命卽補直隸巡撫。又爲學士張英請假葬父事。上曰：「張英簡侍講幄，効力多年，敬慎夙著。其父未葬，朕向知之，可給假幾月，令其葬親事竣速來可也。」又給事中岳峯秀條奏事。上曰：「朕於一切章奏俱詳細省覽，未曾忽畧。岳峯秀稱不厭其繁，請賜全覽者，是不知朕也。若章奏不爲詳閱，幾務如何裁決？此疏傳出，衆見能勿謂朕未覽本章乎？可將此意票出，嚴飭行。」本日起居注官阿山、徐乾學。

二十七日乙亥。早，上御乾清門，聽部院各衙門官員面奏政事畢，部院官員出。大學士、學士隨捧折本面奏請旨：爲吏部題補副都御史員缺，遵諭將以次應陞各官再行開列事。上曰：「此內馬世濟堪用，着陞補副都御史。」辰時，上詣太皇太后宮問安。本日起居注官常書、潘耒。

二十八日丙子。早，上御乾清門，聽部院各衙門官員面奏政事畢，部院官員出。大學士、學士隨捧折本面奏請旨：爲宗人府題，貝子古爾馬渾之子薩山，或照新定例封爲鎮國將軍，或照舊例封爲輔國將軍請旨事。上曰：「朕念古爾馬渾貝子自幼効力，已封其子瓦山爲輔國公。其諸子應照定例封輔國將軍，乃含糊微倖，冀封鎮國將軍，請旨不合。着將此諭明白傳示，原本發回。」本日起居注官崔蔚林、牛鈕。

二十九日丁丑。早，上幸南苑。是日，各部院本章交與內閣。本日起居注官胡簡敬、

阿山。

三十日戊寅。早，上御乾清門，聽部院各衙門官員面奏政事畢，部院官員出。大學士、學士隨捧折本面奏請旨：爲兵部題補四川提督員缺，或將副都統或將在外總兵官開列請旨事。上曰：「以孫思克補用何如？」大學士明珠奏曰：「孫思克威震西陲，番彝畏服，似應留鎮在西，遇彼處缺出陞用。」上曰：「然，現在有應裁提督否？」查明來奏。」辰時，上御乾清宮，講官庫勒納、陳廷敬、孫在豐進講：晉康侯一節、象曰晉進也二節。巳時，上詣太皇太后宮問安。本日起居注官阿山、王鴻緒。

## 二月

初一日己卯。黎明，上率諸王、貝子、公等，內大臣、大學士、都統、尚書、精奇尼哈番、侍衛等，詣堂子行禮畢，回宮。未時，上御保和殿，賜進貢土默特部落一品台吉魯希夏布等、都統巴扎爾等，翁牛忒部落三品台吉吳巴什等，吳喇忒部落三品台吉顧錫等，扎薩克部落一品台吉諾爾布等，蘇尼忒部落四品台吉零瑚等，阿霸哈納爾四品台吉巴定等食。本日起居注官常書、徐乾學。

初二日庚辰。早，上御乾清門，聽各部院衙門官員面奏政事畢，部院官員出。大學士、學士隨捧折本面奏請旨：爲議政王、大臣會議，都統根特不請旨擅拘禁提督佟徽年；又不進重慶，輒以山大路險題請；又令進勦譚弘、彭世亨，復推諉規避，應革職解任。上曰：「根特才具頗優，人亦健壯，情罪不甚重大，即行解任，稍覺可惜，應酌降數級，從寬留任。」辰時，上御乾清宮，講官庫勒納、陳廷敬、孫在豐進講：象曰明出地上晉一節、初六晉如摧如一節。本日起居注官牛鈕、湯斌。

初三日辛巳。早，上御乾清門，聽各部院衙門官員面奏政事畢，部院官員出。大學士、學士隨捧折本面奏請旨；爲吏部題補內閣學士，開列詹事達岱等事。上曰：「這開列各員中孰優？」大學士勒德洪奏曰：「臣衙門侍讀學士丹岱、翁英、圖納俱可用。」上曰：「詹事達岱歷任年久，何如？」勒德洪、明珠奏曰：「此人亦可用。」上曰：「其中無有比達岱年久者，且又堪用，著補授學士。」又題補福建布政使員缺，正擬按察使馬斯良，陪擬張所志。上曰：「馬斯良曾爲吏部郎中，乃庸常人。」明珠奏曰：「馬斯良任按察司年久，且在長沙等處軍前辦理糧餉，頗有勤勞。」上曰：「九卿亦以此會推，著如所擬。」又禮部題原任大學士·都統·公圖海諭祭並謚號請旨事。上曰：「圖海勳舊大臣，勞績甚多，著與謚致祭二次。票與溫旨。」又議政王、大臣會議處分護軍參領圖爾都渾等，分別革職降級事。上曰：「此議尚輕。圖爾都渾原係侍衛，是朕甚優眷，彼應率先衝鋒，比衆倍加奮力爲是。反以行軍大道爲狹隘，妄稱不能旋馬。後知事誤，又巧稱無此言語。若此輕擬，何以勉勵後人？我朝用兵，全賴前鋒哨探之人，倘皆效此欺誑，如何行師？伊等罪犯，草率輕擬不合！爾等傳諭議政王等知之。」辰時，上御乾清宮，講官庫勒納、陳廷敬、孫在豐進講；六二晉如愁如二節、六三衆允悔亡二節。未時，上詣皇太后宮問安。酉時，上復詣皇太后宮問安。本日起居注官阿山、曹禾。

初四日壬午。早，上御乾清門，聽部院各衙門官員面奏政事畢，部院官員出。大學士、學士隨捧折本面奏請旨；爲禮部題遣祭嶽瀆官員事。上曰：「舊例如何差遣？」大學士明珠等奏曰：「或論品級或論衙門差遣，俱出上裁。」上又問：「此等差遣官員亦有限期否？」明珠等奏曰：「去時自速，來便可緩，原無定限。」上曰：「若無限期，必致遲緩。傳諭禮部，勒定期限。此本送進，朕酌量點出。」又議政王、



大臣會議處分護軍參領圖爾都渾等事。上曰：「行軍全賴探視道路，擒取生口，偵聽消息。因遣圖爾都渾等庸怯之輩往視道路，故致貽悞軍機。此等情罪甚爲可惡，著將此旨票出。其申飭議政王等不行詳議等語，仍留之。」又兵部題補歸化城都統事。上曰：「爾等曾問否？」明珠奏曰：「臣等遵旨問蒙古大臣，伊等云，吳巴什不甚相識。但蒙皇上隆恩，念其勳舊之臣，將伊嗣補授都統，其所轄蒙古無不欣服。」上曰：「吳巴什着補授歸化城都統。」辰時，上御乾清宮，講官庫勒納、陳廷敬、孫在豐進講：九四晉如鼫鼠二節、六五悔亡二節。巳時，上詣太皇太后、皇太后宮問安。本日起居注官常書、嚴繩孫。初五日癸未。早，上御太和門視朝。文武陞轉官員謝恩畢，回宮。少頃，御乾清門，聽部院各衙門官員面奏政事畢，部院官員出。大學士、學士隨捧折本面奏請旨：爲宗人府題，閒散宗室勒爾金贈朱方旦扁額，至人里聖人堂「字樣，應行文巡撫王新命，查其果有憑據否？或係朱方旦自行標榜？俟問明具題到日再議事。上曰：「此事無容行查，贈與扁額甚真。前勒爾金領兵在荊州時，朕已聞此等事，曾諭彼時差去之人。朕知朱方旦係狂妄小人，軍機大事萬不可聽其蠱惑。又對親遣往軍前，回時路經武昌，原任巡撫張朝珍向對親云，朱方旦果一奇異神人，爾宜相會。遂開中門接見，以賓禮優待。由此觀之，勒爾金所贈扁額是真，不必行查，著即行議結。」又三法司議，投賊奔回護軍傅喀應即行處絞，將妻孥交與內務府事。上曰：「此非甚可惡之人，且自行奔回，著從寬免死發落。」又都察院題御史內陞外轉事。上曰：「此內唐朝彝、熊焯甚爲庸劣。外轉雖屬調遣，尚可得監司要任，有情願外轉者，亦未可定。朕曾有旨令議，亦是此意。應將優者內陞，次優者外轉。爾等之意若何？」大學士明珠等奏曰：「聖諭甚是。」上曰：「爾等可行詳議，朕亦再爲裁度。」又爲原任巡撫慕天顏交代職務事。